

虫

蒼

蟲薈卷三目錄

蠶

野蠶

地蠶

海蠶

金蠶

金蠶

石蠶

火蠶

冰蠶

雪蠶

蛭

雲師

雨虎

蛭蟪

宵行

尺蠖

螟蛉

蘘香蟲

蟻蟪

蝻蟪

好蚘

螟

蠋

蛭

蜂

土蜂

沙蜂

石蜂

竹蜂

木蜂

菌蜂

胡蜂

草蜂

獨蜂

鸞蜂

蛭蜂

赤翅蜂

折腰蜂

細腰蜂

獨腳蜂

蜚蠊

木蠹

鹿蠹

扁前

雄黃蟲

馬蟬

冠蟬

寒蟬

蠕母

蠅蛄

蜋蛄

茅蛄

螭

龐降

青蚨

蠶蟲

碎車蟲

蛺蝶

鬼蛺蝶

媚蝶

紺蝶

蛾

飛蛾

朝菌

巴蟥蟲

蜻蛉

豆娘子

螳螂

土蝨

草蝨

阜蝨

蜚蝨

蟹蝨

莎雞

蜘蛛

螻蛄

蜚

蠅

狗蠅

黃蠅

怪哉

蚊

豹腳蚊

蚋

蟻子

浮塵子

蠓

蜚

青腰蟲

焦螟

落頭蟲

天牛

蠹

獨角仙

飛生蟲

蜣螂

蜉蝣

棗貓

斑貓

地膽

葛上亭長

青娘子

紅娘子

金龜子

蜣

蠨蛸

氣蠶

蛄蛄蟲

叩頭蟲

啞臘蟲

螢

守瓜

蠱

龍龜

花龍龜

草龍龜

土龍鼃

山龍鼃

海龍鼃

大懶毒辣

壁錢

蠨蛸

蠅虎

守宮

避役

蛤蚧

蜥蜴

雲蟲

雖

蜩

諾龍

蛇醫

雷公馬

蜈蚣

海蜈蚣

草鞋蟲

馬蛇

飛蛇

蝎

蚤

蝨

龍蝨

牛蝨

壁蝨

沙蝨

竹蝨

水蝨

蠟蟲

蟬

鞠通

竊蟲

嚮蟲

樟蟲

蝥蟲

結草蟲

鐵生蟲

食膠蟲

恙

青牛

窟蟲

黃蟲

蟋蟀

金鐘兒

竈馬

藥思蠱

山子

鼠負

丹戩

蚰威

砂按子

蟻

朽蟻

白蟻

赤蟻

獨腳蟻

天鰕蟲

蚰蜒

斜耕蟲

蚯蚓

巨擘

雷蜺

度古

水蠱蟲

蟹墓

海蟹墓

田父

謝豹

山蛤

溪狗

蟾諸

海蟾

蛙

蛤蛙

鼃

水雞

石雞

水虎

壓油

蟻

蚨青

土肉

元羅

威車

海參

海燕

水蠶

水鼯

負子

石尤

豉蟲

寫字蟲

九香蟲

泥

蛭

飛馬蠟

禾蟲

蛭

蛆

水蛆

蟲薈卷三

睦州方旭

昆蟲

蠶

爾雅 蠶桑繭 註食桑葉作繭者卽今蠶

續廣雅 蠅蛾女兒龍精蠶也

淮南子 蠶二十一日而化

羣經字考 蠶無牝牡至化爲蛾乃有雌雄○旭按

蠶之雌雄作繭後卽知雄蠶繭尖而細雌蠶繭員而

大又蠶繭有黃白兩色或說又有黑色者

博物志 蠶蛾先孕後交不交者亦產子其子爲蛾

無眉目

皇圖要覽 伏羲化蠶爲絲黃帝元妃西陵氏始養

蠶

格致鏡原 蠶神曰菀窳婦人寓氏公主凡二人

蠶經 蠶性喜靜而惡喧喜煖而惡濕

雜五行書 三月三日天陰無日而不雨蠶必佳

本草綱目 蠶死而不朽故曰殭蠶再養曰原蠶又

曰晚蠶曰魏蠶曰夏蠶曰熱蠶蠶屎曰蠶沙

周禮 馬質禁原蠶 註蠶與馬同氣蠶勝則馬衰

故禁之

蠶書 世傳蠶繭之未蛾而竅者不可爲絲頃見隣家誤以竅繭雜全繭治之皆成絲焉嗚呼世知此法者肯以教人則貸蠶之死可勝計哉

野蠶

爾雅正義 野蠶有數種食樗葉成繭者名雉由食蕭葉成繭者名虬食棘葉成繭者卽柘蠶也與桑蠶並育又有食櫟葉及紫蘇葉成繭者。旭按今山中有一種似蠶而小帶黃色者亦名野蠶但能吐絲並不作繭又事物紺珠載橫州楓樹上有楓蠶其狀似蠶而色赤黑四月吐絲光明如琴絃此亦野蠶類也

或又名絲蟲

地蠶

赤雅 地蠶如蠶蛹無頭蠕動獠人爲鮮食之令人
不寒肉頗香美

海蠶

本草綱目 海蠶生南海山石間狀如蠶大如拇指
其沙甚白如玉粉狀有節然難得真者彼人以水澆
葛粉石灰用梳齒印成僞充之李珣曰海蠶沙治虛
勞及諸風不遂然僞者損人

金蠶

洗冤錄 金蠶卽食錦蟲蟲屈如指環金色食故緋
帛錦如蠶之食葉滇蜀湖廣閩粵奸人畜之其糞置
飲食中毒人立死蠶得所欲日置他財使人暴富然
遣之極難水火兵刃所不能害必倍其所致金銀錦
物置蠶於中投之路旁人偶拾之謂之嫁金蠶不然
能入人腹食人腸胃完而後出

本草綱目 有人守福清民訟金蠶毒求治不得或
令取兩刺猬入其家捕之必獲旣而刺猬至果於床
下墻隙擒出

金蠶

杜陽雜編 永奉元年東海彌羅國貢碧玉絲其國有桑枝幹盤屈覆地而生大者蔭數十頃小者亦蔭百畝其上有蠶長四寸金色人亦謂之金蠶其絲碧卽碧玉絲也絲縱之一尺引之一丈雖十夫挽之不斷。旭按此與上金蠶不同又梁西公記載扶桑之蠶長七尺圍七寸色如金四時不死五月八日吐黃絲四絲足勝一鈞若齊卵至勾麗國遂變小如中國之蠶

石蠶

正字通 石蠶附生水中石上作絲繭如釵股長寸

許以蔽其身其形似蠶而細小有角節青黑色一名石下新一名石蠹蟲

本草拾遺 石蠶春夏間化小蛾飛水上

火蠶

八紘譯史 火蠶產火州其綿絮衣一襲止用一兩多則熱不可耐

冰蠶

拾遺記 員嶠山有冰蠶長六七寸黑色有鱗角以霜雪覆之則作繭長尺許抽五色絲織爲文錦入水不濡拔火不燎堯時海人獻之

灤陽續錄

乾隆癸酉頭等待衛常君青戍守西城

卓帳南山之下其山有飛瀑泉甚甘會冬月冰結令人鑿之水竅甫通卽有無數冰丸湧出如橄欖狀破之有白蟲如蠶口與足深紅色此殆所謂冰蠶也

雪蠶

本草綱目 雪蠶生陰山以北及峨嵋山比彼人謂之雪蛆二山積雪歷世不消其中生此蠶大如瓠味甘美能治積熱。旭按卽冰蛆也多食則口鼻出血

蛭

正字通

蛭狀如蠶青色亦有五色者老則作繭化

蛾孚子諸草木上皆有之。○旭按此卽爾雅之烏蠋也。春夏間有之。生藿上者名藿蠋。其氣香。生槐上者名槐蠋。其氣臭。生枸杞上者名枸杞蟲。能治腎家風虛。

雲師

遁甲開山圖 霍山有雲師 註雲師似蠶長六寸有毛似兔

雨虎

遁甲開山圖 霍山有雨虎 註雨虎似蠶長七八寸在石內雲雨則出可炙食

蜎蜎

韻彙 蜎蜎一名蜎蜎

韻雅 蜎蜎似蠶一頭數尾長二三尺有腳可食

宵行

毛詩集傳 宵行蟲名如蠶夜行喉下有光如螢○

旭按此蟲生濕處黃梅時節最多狀似蠶而小灰色
項下有光如螢又名螢蛆又名蠋

尺蠖

埤雅 尺蠖似蠶食葉老亦吐絲作室○旭按此蟲
似蠶而細長寸許青色其行必屈而後伸故又名步

屈又名螂蠖又名桑闔今二三月桑樹上有之草中尤多入夏能羽化又有一種黃色者藍色隨所食之葉而變也

螟蛉

爾雅 螟蛉桑蟲 註俗謂之桑蠋亦曰戎女。旭按此桑上小青蟲也似尺蠖而尤細

懷香蟲

本草綱目 懷香蟲生懷香枝葉內狀如尺蠖青色能治小腸疝氣

蟪蛄

正字通 蟻蟮一名蟻蟮一名乳齊一名應條一名地蠶一名蜚蠊其狀似蠶而大身短足長有微毛以背滾行乃濕熱之氣所化。旭按此蟲大者長三四寸小者一二寸其肉白而肥菜園泥土中有之入秋化蟬又蟻蟮之蟻音肥通作蜚

冲虛經 烏足之根爲蟻蟮

格致鏡原 蟻蟮蒸熟食明目搗生汁滴入耳中去翳障

蟻蟮

爾雅 蟻蟮蜎 註在木中。旭按蟻蟮木蠹也一

名蛭蠅其狀似蟻螬而細足短口黑身白無毛節入
秋化天牛方言及爾雅邢疏與蟻螬混爲一物誤又
諸木中蠹狀雖相似用各不同桃蠹能辟鬼魅桂蠹
能愈痰疾他如柳蠹朽蠹棗蠹皆各有所宜並見本
草竹亦有蠹草中如蘆蒿皂莢蒼耳子等皆有之其
狀並如野蚘

野蚘

正字通 野蚘食米蟲。旭按此蟲似小蠶赤頭生
米中纏米作繭老則化黑甲小蟲其名不一曰強曰
蚘曰蛭曰蛭蠅曰楊子曰蟬子曰強蟬見爾雅正義

蝻

正字通 蝻食苗心蟲似好舂頭不赤。旭按害苗之蟲有四食心曰螟狀似蠶而絕小頭上黑者是也食葉曰螻或作蝻狀似螟而稍大色紫捲苗葉而居其中者是也食節曰賊狀似蠶而色青者是也食根曰蠹大如黃豆扁身居苗根水中者是也

螺

爾雅正義 螺一名蛄蜚卽蚝蟲也生果樹上大如蠶背有五色毛甚毒能螫人老者口吐白汁凝聚如雀卵蟲處其中夏月則羽化爲蛾生子葉間如蠶子

○旭按此卽辣毛蟲也一名林戴又名紅姑娘又名楊辣子生榴樹上者名天漿子生棘枝上者名棘剛子其房名雀兒飯甕又名躁舍能治小兒諸症見本草又夏間瓦縫中一種小毛蟲人呼瓦蛆又呼毛娘螫人亦毒或說四月八日取秧針一握擲屋上可辟此物然多不驗

蝟

爾雅 蝟毛蠹 註載也○旭按此蟲生脯鱗中狀似蠹而小毛灰赤色老亦化黑甲小蟲

蜂

正字通 蜂一名范其王名萬長尾者名厲短尾者名蠆能釀蜜俗呼蜜蜂其蜜底爲蠟蜜味甘蠟味淡其尾後有芒螫人入肉不出蜂亦尋斃

石藥爾雅 蜂一名羅叉

本草綱目 釀蜜之蜂有三一在林木及土穴中作房者爲野蜂一人家以器收養者爲家蜂並小而微黃蜜皆濃美一在山巖高峻處作房者名石蜜蜂其色黑似牛虫三者皆羣居有王王大於眾蜂而色青蒼一日兩衙應潮上下凡蜂之雄者尾銳雌者尾歧相交則黃退嗅花則以鬚代鼻採花則以股抱之其

房名百穿

方言 蜂燕趙曰蠓螋又曰蚘蛭

蜂記 蜂王無毒窠之始營必造一臺大如桃李王居其上生子於中王之子盡爲王歲分其族而去其分也或鋪如扇或圓如罍擁其王而行王之所在蜂不敢螫若失其王則眾潰而死其釀蜜如脾謂之蜜脾凡取其蜜不可多多則蜂飢而不蕃又不可少少則蜂惰而不作嗚呼蜂王無毒似君德也營巢如臺似建國也子復爲王似分定也擁王而行似衛主也王所不螫似遵法也王失則潰似不貳也取惟得中

似什一而稅也今山人貪其利恐其分而刺其子亦不仁甚矣

近蜂聞畧蜂採百花俱置于股惟蘭花則拱首入房以獻于王

格致鏡原蜂螫人投芋梗敷之則愈或蚯蚓屎亦可

土蜂

正字通土蜂穴居作房赤黑色最大卽馬蜂也本經名蜚零荆巴間名蠪蜂螫人至死其子亦可啖○
旭按蜚雅以蜚零爲木蜂誤

沙蜂

格致鏡原 沙蜂似土蜂而小冬在人家屋上作房
大者如甕小者如斗

石蜂

炮炙論 石蜂在人家屋上作窠大如拳蒼黑色內
有蜂二十一箇或十四箇皆青色

竹蜂

太平廣記 蜀地有竹蜂好於野竹上結窠其窠似
雞卵有蒂長寸許與蜜並紺色其蜜味甘。旭按此
卽方言所謂留師也郭璞作笛師狀似蜂而小色黑

居竹中又名鑽竹蜂

木蜂

正字通 木蜂似土蜂而小山林中木上作房江東人亦啖其子

菌蜂

正字通 菌蜂嶺南毒菌所化其菌夜有光經雨則爲巨蜂黑色喙若鋸長三分螫人立死。旭按酉陽雜俎云此蜂夜能入人耳斷人心繫

胡蜂

正字通 胡蜂色黑一名壺蜂一名元瓠蜂一名瓠

瓢蜂○旭按楚詞云元蜂若壺卽此其狀似蜜蜂而腹較大今人呼草蜂又呼人蜂螫人甚毒駢雅以爲蜜蜂誤

草蜂

本草綱目 草蜂山中大黃蜂也雷斅曰此蜂窠圓一二丈內隔六百二十六箇絕大者至一千二百四十箇其窠入藥最良○旭按此卽本草衍義所謂牛舌蜂也大者長二寸許正黃色螫人及牛馬無不立斃人誤觸之追至十數里外乃止其子如蠶蛹可充饌

正字通 大黃蜂或說卽胡蜂誤

獨蜂

本草綱目 獨蜂窠大如鷲卵皮厚蒼黃色內只一蜂大如小石燕子螫人馬立死。旭按此卽俗所謂九里蜂也大者長寸許毒尤猛螫人不治人誤觸之追至九里外乃止故名

鸞蜂

杜陽雜編 貞元八年吳明國貢鸞蜂蜜其蜂鳴聲如鸞身被五采重十餘斤作窠於深巖峻嶺間大者占地二三畝國人採其蜜只二三合多則有風雷之

異其蜜碧色食之長生顏如童子凡沉疴眇跛諸僻惡之病無不療焉

蜾蜂

正字通 蜾蜂出巴中在褻鼻蛇穴內毒尤猛螫人非方藥可療

赤翅蜂

本草拾遺 赤翅蜂出嶺南狀如土蜂赤翅黑頭大如螃蟹穿土爲窠食蜘蛛蜘蛛遙知蜂來皆狼狽藏隱蜂若預知其處食之無遺

折腰蜂

南蠻記 寧州沙中有折腰蜂岸崩則蜂出土人燒
治以爲琥珀

細腰蜂

爾雅 果羸蒲盧 註細腰蜂也俗呼蠮螋。旭按
果羸之說不一有言其不能育子取螟蛉之子爲子
者如鄭氏詩箋陸氏詩疏楊氏法言段氏酉陽雜俎
之說果羸是也有言其自有子者如陶氏別錄羅氏
爾雅翼寇氏本草衍義李氏本草綱目程氏釋蟲小
記之說果羸是也旭集蟲薈寒暑十數易此事歲歲
驗之其蟲實有兩種一種大如牛蠅微黑色腰甚細

僅相屬者乃細腰蜂也又名穉蜂其窠多在竹管中
管口用泥封固蜂常於窠外作穉穉聲旭曾破其管
視之內有子與桑樹上青蟲子無異更有小青蜘蛛
數枚實其中其蜘蛛有僅存空壳者又有空其一半
而一半尙存者此卽詩所謂螟蛉有子果羸負之是
也一種似蜜蜂而畧大聲甚雄壯好在人家屋下鑽
木作孔生子其中者乃蠮螋也其孔外亦用泥封固
內亦有青蜘蛛實其中陶氏以下所謂自能生子者
此也惟以兩物混爲一物故與詩所云不合又捫蝨
新語分果羸蒲盧蠮螋爲三物亦誤

廣雅疏證

蠮螋銜土作房故又名土蜂然與地中

土蜂不同

獨腳蜂

正字通 嶺南有獨腳蜂似蜂而小黑色一腳腳連

樹根不能動

蜚蜚

本草衍義 蜚蜚似蜜蜂腹凹扁黃黑色食牛馬血

捕取乾之治血閉

木蜚

駢雅 魂常木蜚也

山堂肆考 木蚩最大綠色似蟬今呼王蚩又呼舍命王好食牛馬血致頓仆

鹿蚩

正字通 鹿蚩大如蠅卽牛蚩。旭按此物生牛身上馬身上亦有之

扁前

名醫別錄 扁前生山陵中似牛蚩赤翼

雄黃蟲

名醫別錄 雄黃蟲似蠐螬辟不祥

馬蟬

正字通 大而色黑鳴聲壯者曰馬蟬。○旭按此卽爾雅之馬蜩也。一名蝬。本草名蚱蟬。又名齊女。四五月有之。俗名蜘蛛。其狀方首廣額大腹六足兩翼翼薄如蜻蛉。飲而不食其聲直而長。至八月後止。乃蟬。蟪蛄蜨及朽木所化。又蜻蛉點水生子。草上青鮪魚食之久則生蟲。其狀與蟬相似。名蝦蟇蟲。亦能退壳化蟬。又或說閏年少蟬。

酉陽雜俎 蟬未脫時名服育

冠蟬

正字通 頭有花冠鳴聲清亮者曰冠蟬。又曰胡蟬。

曰蜺曰蟪蛄曰蟪蛄。旭按此蟪蛄似馬蟬而小夏秋間有之俗呼花公子

寒蟬

夏小正 七月寒蟬鳴。旭按寒蟬爾雅名蜺一名寒蜺郭註云寒蜺也或名寒蟬子其狀似馬蟬而小陰綠色有斑文初生時聲啞曰啞蟬又曰瘖蟬又曰瘖蜺立秋後始作聲如云都了都了者九十月聲尤淒切

蟪蛄

通雅 二三月鳴小於寒蜺者蟪蛄

蟪蛄

駢雅

蚘蚘蟪蛄蚘蟪蛄蚘蟪蛄蚘蟪蛄也

○旭按此亦蟬之鳴秋者其狀似寒蟬色青紫

蜋蜋

正字通

五彩具先諸蟬鳴者曰蜋蜋○旭按此蟬

最能鳴多在桐子樹上人又呼桐蛤

茅蜋

正字通

茅蜋在茅管中亦五月鳴○旭按卽麥蜋

也爾雅名蠶郭註云江東名茅蜋又名蜋蜋其狀似

馬蟬而絕小青色吾鄉名青子四五月鳴草中

螻

正字通 小而有文類廣且方者曰螻又曰蜻蜻夏
小正曰蜚者虎懸也卽此。旭按此卽茅蜩之在樹
上者其聲札札然故又名蜚

龐降

嶺表錄異 龐降生嶺南橄欖樹上似蟬腹青而薄
其鳴自呼然聞其聲罕能得之人以善價求爲媚藥
。旭按卽青蟬也狀似橄欖葉

青蚨

駢雅 魚伯螻蛄蠹蛄蛄蛄青蚨也。旭按螻蛄本

草作蟪蛄又名蚨蟬陳藏器曰出南海

蚨蛄神書 青蚨一名蒲蚨似小蟬青金色多集池

澤蒲葉上春月生子於葉八八爲行或九九爲行大

如蠶子

淮南子註 青蚨一名魚父取其子母各等置囊中

埋東行垣下三日開之以母血塗八十一錢子血塗

八十一錢留子用母留母用子皆自還。旭按或說

用子塗貫母塗錢

元怪記 青蚨味辛可食

蟪蛄

墨客揮犀 蠚蟲似蟬形小而扁隱屋壁及書冊中
前有兩長足如蟹螯觸後則旁行觸前則卻行螫人
名惡蠚不治殺人。旭按此物大如壁蝨然未見螫
人

碎車蟲

酉陽雜俎 碎車蟲狀如唧唧蒼色好棲高樹上其
聲如人吟嘯終南有之其大而黑者聲亦呼唧聊俗
呼沒鹽蟲。旭按唧聊未詳

蛺蝶

正字通 蛺蝶一名胥

古今注 蛺蝶一名野蛾一名鳳蝶江東名撻末色
白背青者是也其大如蝙蝠者或黑色或青斑名鳳
子一名鳳車一名鬼車生江南。旭按蛺蝶或作蛺
蝶卽蝴蝶也四翅有粉好嗅花香以鬚代鼻春月甚
多又名春駒草木葉及諸蟲所化又旌異記載童貫
將敗時其家烹肉未熟忽化蝴蝶數萬飛去

鬼蛺蝶

桂海虞衡志 桂海多鬼蛺蝶大如扇四翅好集荔
枝上。旭按一種黑而大如扇者俗說名元武蟬殆
卽此又一種大如笠黑者名梁山伯黃者名祝英台

往歲在江淮曾見之亦此類又秋間一種絕小而色灰白者俗亦名鬼蛺蝶又海中有大蝴蝶重八十斤味極美

媚蝶

南方草木狀 南海出鶴草花形如飛鶴上有蟲老脫爲蝶赤色名曰媚蝶女子藏之能使其夫憐愛

紺蝶

古今注 紺蝶一名蜻蛉其狀似蜻蛉而色元紺遼東人呼紺繡又呼童繡又呼天雞七八月羣飛暗天夷人食之乃海中青鰕所化

蛾

爾雅正義 蛾一名羅孫炎云蛾是雄羅是雌說殊
穿鑿。旭按卽蠶蛾也其狀頗類蝶而眉曲如畫

飛蛾

事物紺珠 飛蛾一名霜蛾

古今注 飛蛾一名火花一名慕光好撲燈。旭按
卽燈蛾也花者名文蛾

朝菌

淮南子註 朝菌朝生暮死之蟲也生水上狀似蠶
蛾一名孽母。旭按此卽廣雅之朝蜉也生水邊一

名魚糧白露時最多又名白露蟲亦好撲燈

巴蜡蟲

灤陽消夏錄 西域有巴蜡蟲似蠶蛾而大有鉗距
夜飛逐人人以水噴之則輒而伏或噴不及爲所中
急嚼茜草根敷之可瘡否則毒貫心死

蜻蛉

博物志 五月五日埋蜻蛉頭於西向戶下三日化
青色之珠。旭按此卽俗所謂蜻蜓也其狀露目短
項長腰細尾六足四翼翼薄如紗雄色青雌陰綠色
處處有之將雨時水邊尤多其名不一曰螳曰負勞

山經卷三
二
曰白宿曰桑根曰戀惹曰紗羊曰虻蛭曰螳蚱黃者
曰胡梨曰螻蛄曰江雞赤者曰赤卒曰絳騶曰赤衣
使者曰赤弁丈人絕大者曰諸乘曰馬大頭又龍鱗
中有蟲亦能化赤色小蜻蛉名龍甲又名龍孫取之
者必病瘡

豆娘子

事物紺珠 豆娘子似蜻蛉而極小堅翅

螳娘

逸周書 芒種之日螳娘生不生是謂陰息。旭按
此物感陰氣而生其狀驤首露目修頸長臂大腹四

足青色翼下色紅腹內有黑線兩條其名尤多爾雅
曰蟬曰莫貉曰不過曰蠙蠙曰蠙蠙郭氏註曰蟬蠙
曰石蠙廣雅曰芊芊曰齧肱太平御覽引作齧肱方
言疏證引作齧肱說文曰斲父庶物異名疏引作研
父孔氏月令疏引方言曰食廐曰馬穀蔬文類聚引
食廐作食肱馬穀作馬敷太平御覽又作馬敷淮南
子註曰天馬曰拒斧呂氏春秋註曰齧肱本草綱目
曰蝕肱曰刀蠙正字通曰織絹娘七修類稿曰殺蟲
曰斧蟲其子曰螭螭曰蟬蛸曰烏洩曰冒焦生桑上
者曰桑螭蛸

土蝻

爾雅 土蝻蟻舘 註似蝗而小今謂之土蝶。旭

按蝶或作虵卽虵蟻也生淺草中尖頭青色善躍亦
能飛俗名蚱蟻又名虵蛄大者長寸餘一種相似而
灰黑色者多在牛糞邊與蚯蚓爲雌雄本草拾遺云
五月五日伺其偶合收而佩之令人相愛

草蝻

爾雅 草蝻負蟻 註常羊也。旭按此物似蚱蟻

而大頭正方青色亦能飛躍草中有之詩名草蝻

阜蝻

爾雅 阜螽蟻 正義蝗蟲也。○旭按蝗蟲似草蟲而尤大翅旁有竅可以縷貫其頭有王字亦有在腹背上者羣飛暗天食苗立盡其子曰蝻曰蝻蛄見爾雅

二申野錄 蝗蟲是官吏貪殘所致頭赤身黑曰武官蝗頭黑身赤曰文官蝗

蜚螽

爾雅 蜚螽蝻蛄 註蝻蛄也俗呼春黍。○旭按此物似草蟲而畧大翼長能飛又能躍頭有兩鬚如角灰黃色亦有青色者五六月以股相切作聲

正字通 周南云螽斯羽邠風云五月斯蟲動股皆指螽螽而言幽州人又呼春箕

螽螽

爾雅 螽螽螽 註今俗呼似蚣蟻而細長飛翅作聲者爲螽螽。旭按此物似草蟲而小灰黑色翅長健飛尤耐寒冬月伏草中

莎雞

廣志 莎雞亦曰犢雞

草木蟲魚疏 莎雞似蝗而色斑翅數重其翅正赤或謂之天雞六月中飛而振羽索索作聲幽州人謂

之蒲錯。旭按此卽俗所謂紡織娘也。其狀似蝗而小。羽灰黃色或青色。羽下深紅色。六七月生草中。好夜鳴。其聲如紡線。故又名促寒娘。又名紡織娘。又名紡絲。又名絡緯。又名梭雞。好事者畜之。樊中飼以南瓜花及絲瓜花。然秋深則死。一種相似而小。色純青。身短翼長。夜作唧唧聲者。亦此類。又一種似莎雞而翼短。不能蔽身者。俗名叫哥哥。人亦畜之。並以翼鳴。

唧蛆

爾雅 蒺藜唧蛆 註似蝗大腹長角能食蛇腦

赤雅 唧蛆一名蜈蚣狀若水鰕小者一寸大者一

丈其尾有光山中修蛇無故死者被敝也蛇死皆化
螂蛆

螻蛄

爾雅 螻蛄天螻 註螻蛄也。旭按螻蛄名螻一名
天螻卽下文所謂蝼蛄螻蛄也方言名蛄蛄又名杜蛄
又名螻蛄又名蝼蛄又名杜狗廣雅名炙鼠又名津
姑又名螻蛄又名蝼蛄其身狹而長兩鉗四足雄者
有短翅能飛雌者腹大翅小不能飛其穴在泥土中
夜鳴聲如蚯蚓俗又名土狗又名地狗其性喜撲燈
又名偷火蟲又名仙姑夏秋間處處有之本經誤以

爲蠅蛄圖經本草誤以爲梧鼠碩鼠李時珍本草襲其說更以月令蝮蠃爲蝮蛄不知蝮蛙也二物同鳴於孟夏時故月令連舉之今合爲一物尤誤

蜚

爾雅 蜚蠊蟹 註蜚卽負盤臭蟲

本草綱目 蠊蟹卽蜚蠊也一名石薑一名負盤一名滑蟲一名茶婆蟲一名香娘子生壁間及竈下其身似蠶蛾翼大腹背俱赤黑色能飛喜燈火光其氣臭其尿尤甚西南夷食之羅願云此物清旦食稻花日出則散水中有一種酷似之。旭按或說此蟲置

燈火上炙之可食今木器中有之其子大如黃豆形
長而扁赤黑色有節文羅說食稻花乃另是一種詳
後

蠅

四書考 蠅生於爛灰一名景跡

方言 蠅東晉謂之羊

正字通 蠅類不一青者生溷廁中頭赤背如負金
其糞能敗物麻者最大一名胡蠅乃麻根所化一種
小者好集几案殺羞間

敬信錄 蠅溺水死得灰仍活

狗蠅

本草綱目 狗蠅生狗身上似蠅黃色能飛堅皮利
嘴啖狗血冬藏狗耳凡痘瘡倒靨用七枚搗碎和酒
服最良

黃蠅

方輿勝覽 雲南毒蛇鱗中有蟲名黃蠅嚙人成瘡
但勿搔以冷水沃之擦鹽少許卽瘡

怪哉

正字通 漢武帝幸甘泉有飛蟲赤如肝頭目口鼻
悉具東方朔曰此必秦獄處也其蟲名怪哉始皇拘

殺無辜憤氣所積致生此蟲惟得酒可解乃以蟲投酒中立消

蚊

古今注 蚊曰白鳥又曰黍民

格致鏡原 蚊又曰門下蟲

談薈 鰻鱗骨燒烟辟蚊

本草備要 夜明砂同鼈甲燒烟辟蚊

正字通 嶺南有蚊樹實似枇杷內有蚊塞北有蚊母草葉中生蚊又有蚊母鳥能吐蚊

豹腳蚊

正字通 水中子子化豹腳蚊○旭按此蚊有黑白
花喙尤利

蚋

四書經註集證 蚋喜亂飛其狀似蚊而小望之如
霧○旭按此物齧人有毒一名瞽蛄又名金剛鑽
蠓子

長慶集 小於蚋而黑者名蠓子伏巴蛇鱗中齧人
甚毒

浮塵子

長慶集 一種微不可見與塵相浮上下者名浮塵

子亦伏巴蛇鱗中能透衣齧人成瘡毒惟取楸葉搗敷始瘥。旭按談薈云黔南有微塵其色白視之不可見能害人惟燒粗茶烟如焚香狀則無否則雖密幃亦不可斷蓋卽此物又山東野草中有一種小蟲微不可見嗜人甚痛俗名挈不住亦此類又蠻地有蟲名雞末子亦極細而齧人

蠓

爾雅 蠓蠓蠓

正字通 蠓蠓卽醯雞也生酒醢中狀如蚋而小郭璞曰醢則風春則雨言此物將風則旋飛如醢將雨

則上下如舂也。旭按郭璞蠨蠸贊又曰風舂雨磴
山堂肆考 醢雞一名蠨

蜚

正字通 蜚輕小似蚊善飛食稻花。旭按稻花開
日若雨暘不時則生小飛蟲羣集稻花上食稻花令
稻不實卽此蟲春秋所謂蜚是也劉歆以爲負蠶劉
向以爲非中國所有並誤邢氏邵氏引此說以解爾
雅之蜚尤誤

青腰蟲

本草拾遺 青腰蟲大如中螳赤色腰中青黑似狗

獨尾尖有短翅能飛春夏有之着人皮肉腫起剝人皮面能除印字至骨者

焦螟

續廣雅 嬰兒焦螟也

冲虛經 江浦之間生麼蟲名焦螟羣飛而集於蚊睫勿相觸也栖宿往來蚊勿覺也

落頭蟲

博物志 南方有落頭蟲其頭能飛以耳爲翼

天牛

正字通 天牛卽天水牛有角如八字又名八角兒

○旭按此物長寸許甲光如漆下有翅能飛頭有二角向前如牛牛喙黑而扁六足夏秋間有之雨後則出又名桑羊

蠶

爾雅 蠶齧桑 註似天牛長角體有白點喜齧桑樹作孔入其中江東呼齧髮

獨角仙

正字通 獨角仙似天牛一角夏月有之出則雨

飛生蟲

本草拾遺 飛生蟲似齧髮頭亦有角燒灰水服治

難產執手中亦可

蜣螂

古今注 蜣螂能以土包糞推轉成丸故又名轉丸
又名弄丸

駢雅訓纂 廣雅云天柱蜣螂也原註作天杜疏證
作天杜

本草綱目 蜣螂一名蜣螂一名推丸一名推車客
一名黑牛兒一名鐵甲將軍一名夜遊將軍寇宗奭
曰其類有兩種大者曰胡蜣螂甲黑而光腹下有小
黃子附母飛晝伏夜出見燈光則至小者甲黑而暗

晝飛夜伏並有聲洪洪然狐喜食之

公餘雜志 凡赤白痢噤口痢及泄瀉等症用蜣蜋
燒研燒酒下一錢或半錢立效小兒用黃酒下

灤陽續錄 蜣蜋曝乾爲末以鹿血調之仍曝乾可
以充火藥但比硝磺力少弱耳又一蒙古台吉云鳥
鎗貯火藥鉛丸後再加一乾蜣蜋比尋常可遠出一
二十步

蜣蜋

爾雅 蜣蜋渠畧 註似蛄蜣身狹而長有角黃黑
色叢生糞土中朝生暮死豬好啖之

草木蟲魚疏 蜉蝣甲下有翅能飛夏月陰雨時地
中出炙食味如蟬

淮南子 蜉蝣不食不飲三日而死

棗貓

本草綱目 棗貓棗樹上飛蟲也大如棗子青灰色
兩角採取陰乾治小兒臍風

斑貓

本草綱目 斑貓卽斑蝥也又名斑蚝又名龍蚝吳
普本草名斑菌又名蜃髮又名晏青。地按此物處
處有之其狀頗類蟬而大如巴豆尖喙六足黑甲有

黃畫人若捕之則尾後射出惡氣臭不可聞或說牛誤食之亦脹死

地膽

本草綱目 地膽一名虻青一名青蠅吳普本草名青虹又名杜龍廣雅名蛇要又名青螯處處有之在地中。旭按此物似斑貓而黑頭赤尾

葛上亭長

神農本草經 葛上亭長生葛花上黑身赤頭如亭長之元衣赤幘。旭按此物小於斑貓黑甲能飛

青娘子

本草綱目 青娘子卽芫青也。旭按此物似斑貓而小甲上青翠色中有黃文一道

神農本草經 春食芫花爲芫青夏食葛花爲葛上亭長秋食豆花爲斑貓冬入地中爲地膽

紅娘子

圖經本草 樗樹上一種赤色小蟲人呼爲紅娘子。旭按爾雅翰天雞郭註云小蟲也黑身赤頭一名莎雞一名樗雞卽此物廣雅名樗鳩其狀似斑貓而小甲上黑色兩脅及腹下正紅色生樗樹上能下胎

金龜子

嶺表錄異 金龜子甲蟲也春夏間生草木上大如
小指甲能飛狀如金色龜兒行必成雙里人採取陰
乾裝以金翠爲百物之飾。旭按此卽爾雅所謂蚊
蠚蟬本草拾遺所謂吉丁蟲也狀似斑貓而小文采
如金又名金蟲又名金花蟲產嶺南可爲媚藥一種
相似而長至寸許兩頭尖者亦此類處處有之亦有
五色者或又呼紅娘

蜺

爾雅 蜺縊女 註小黑蟲赤頭喜自經死。旭按
此物好吐絲自懸故名縊女其背有黑甲

蝨
蝨

駢雅 蝨蝨毒蜺也 訓纂蝨蝨大如蜺有毒。旭

按柳宗元蝨蝨傳云蝨蝨者善負小蟲也行遇物必
持取負之雖困劇不止人或憐之爲去其負苟能行
又持取如故疑卽此物然爾雅蝨蝨玉篇又以蝨
蝨爲句

氣蟻

正字通 氣蟻好夜行其形似蜚蠊人觸之卽氣出
○旭按此物一名行夜又名氣盤蟲草中有之黑甲
好夜飛觸之則尾後射出臭氣俗名撒屁蟲一種褐

色小而兩頭尖者亦此類

腴顙蟲

本草拾遺 嶺南有腴顙蟲狀似氣盤褐色身扁佩之令人相愛

叩頭蟲

異苑 叩頭蟲形色如大豆咒令叩頭或吐血皆從所教殺之不祥佩之令人相愛。旭按此亦黑甲小蟲按其後則叩頭有聲仰其腹能自跳起俗說跳高則米貴跳低則米賤又名跳米蟲

啞臘蟲

本草綱目 廣西南界有唆臘蟲大如麥有甲羣飛
食死人惟覆以豹皮則不來或用梓板作器亦可辟
此物

螢

格致鏡原 螢腐草及爛竹根所化卽螢火也一名
燐一名耀夜一名輝夜一名景天一名熠燿一名丹
良一名丹鳥一名宵燭一名夜光一名夜炤一名卽
炤一名救火一名據火一名挾火西北方最多大者
如棗

支雅 大梁無螢

神仙感應篇 螢火鬼箭羽蒺藜各一兩雄黃雌黃
各二兩殺羊角燒存性一兩半礬石火燒二兩鐵椎
柄入鐵處燒焦一兩半俱爲末以雞子黃丹雄雞冠
一具和搗千下丸如杏仁用三角絳囊盛五丸出外
帶左臂從軍繫腰中居家挂戶上能辟盜賊鬼魅及
一切疾病蛇虺虎狼等物

淮南萬畢術 生取螢火裹以羊皮置土中馬見之
鳴不敢前

拾遺記 岱輿山有螢火大如蜂音如雀八翅六足
五色

守瓜

爾雅 蠪與父守瓜 註今瓜中黃甲小蟲喜食瓜
葉○旭按卽瓜蠅也狀似螢能飛一名忿鼠

爾雅平議 蠪與父三字連文或說蠪名與父非也
蠪

正字通 滇中有蠪遇亥夜則飛出飲水其光如星
蠪

駢雅 蠪螭螭蛛網工社公蛛螭螭螭也○旭
按一種赤斑者名絡新婦又有一種俱人面形者或
說香港有之

幽明錄 乾霍亂用活龍蜃去腳吞之奇效

酉陽雜俎 以盆覆寒食飯於暗室地上入夏悉化

龍蜃

字說 龍蜃設一面之網物觸而後誅之知乎誅義
故曰龍蜃

花龍蜃

本草綱目 花龍蜃絲最毒能斷牛尾有人遺尿絲
纏其陰後卒爛斷。旭按此物多生濕地其身俱五
采絲可纏贅瘤

普濟方 五月五日取花龍蜃一枚晒乾用絳囊盛

之遇有患瘧不止者臨期勿令知男左女右繫其臂
上便止

草鼯鼯

爾雅註 草鼯鼯絡幕草上。地按卽蚰蟧也似鼯
鼯而小斑色亦有青色者

土鼯鼯

正字通 土鼯鼯卽蚰蟧也俗呼顛當河北人呼蚰
蟧鬼谷子呼蚰母金樓子呼金橐駝

爾雅 王蚰蟧 註卽蟻蟧似鼯鼯在穴中有蓋
金華子 長安小兒多以細草刺地穴間共邀勝負

以手撫地曰顛當出來既見草動則鉤出赤色小蟲
形似鼃鼃江南人謂之釣駱駝蓋以其背似駱駝也
山鼃鼃

酉陽雜俎 山鼃鼃垂絲如匹布有金瘡者剪貼血
立止

海鼃鼃

譯史紀餘 海鼃鼃身如車輪文具五色腹內有珠
能與龍鬬虎豹麋鹿觸其絲皆無得脫海人以炬焚
之取其皮爲履可以不航而涉

大懶毒辣

坤輿外紀 意大理亞有鼯鼯類名大懶毒辣螫人
人或如風狂或嬉笑或跳舞或卧或奔走療其疾者
以各人本性所喜音樂解之

壁錢

本草拾遺 壁錢壁鏡也狀似鼯鼯作白幕如錢貼
墻壁上北人名壁繭。旭按卽喜蟺也一名扁蟺一
名近喜一名喜子一名喜母一名解憂一名親客一
名青鳥處處有之其子生幕中不螫人李時珍引或
說言咬人至死者乃另是一種詳鱗蟲蛇類

普濟方 蟲牙痛以壁錢幕包胡椒末塞耳中右痛

塞左左痛塞右以手掩住側卧片時俟額上有微汗
出卽瘉

蠪蛸

爾雅 蠪蛸長路。旭按自來說蠪蛸者多以爲喜
子然喜子足並不長與長路之名不合一種似喜子
而腹大色黑八足長至二寸許者疑是此物其子抱
而行夏秋間有之空屋中尤多螫人又能射人以溺
使人成瘡俗名蛛蝥古人謂之蠪蛸李時珍曰蠪蛸
一名搜夾子亦誤搜夾子狀類小蜈蚣黑色皮甚堅
硬六足尾後有針長寸許兩螫遇物則以螫夾之亦

能夾人多生牆腳下磚縫中

千金方 凡患蠹蝨瘡用筆畫地作蠹蝨形以刀取腹中土唾塗數次卽瘳

蠅虎

續廣雅 號蠅虎也

古今注 蠅虎蠅狐也似黿鼉色灰白善捕蠅一名蠅蝗一名蠅豹

淮南萬畢術 五月五日取蠅虎搗碎拌豆自躍擊蠅

守宮

本草綱目 守宮一名壁宮一名壁虎一名蜴虎一名螭虎處處有之狀似蛇醫灰黑色扁首長頸細鱗四足大者六七寸不噬人。旭按昔有人爲守宮所咬痛極後取大龍龜一枚置痛處令吸其毒既而龜鼃腹脹乃捉龜鼃於水上使毒洩盡又置痛處如此兩三次始瘳

漢書東方朔傳註 守宮以器養之飼以丹砂滿七斤搗治萬杵以點女子體終身不滅若有房室之事則滅

避役

本草綱目 避役十二時蟲也出容州交州人家籬
壁及樹木間狀如守官但腦上連背有肉鬣如冠幘
長頸長足青色大者尺許尾與身等嚙人不可療嶺
南志言其首隨十二時變易見者主有慶喜博物志
言其色能變易或青或綠或丹或黃北戶錄言其能
變黃褐青赤四色竊按陸佃言蜥蜴能十二時變易
陶宏景言守宮螫人至死及點臂成痣之說皆是此
物。旭按此疑卽粵志所謂時辰蛇事物紺珠所謂
十二時蠱也又名籬頭蠱

蛤蚧

本草綱目 蛤蚧一名仙蟾馬志曰生嶺南形如守
宮長四五寸尾長與身等甚自愛惜見人取之多自
斷尾而去

廣輿記 蛤蚧產兩廣及雲南

海槎錄 廣西多蛤蚧牝牡上下相呼累日情洽乃
交兩相抱負自墮於地人往捕之亦不知覺以手分
劈雖死不開取爲房中之藥甚效若尋常捕得者但
可爲雜藥

北戶錄 蛤蚧首如蟾蜍背綠色上有黃斑點如古
錦紋長尺許尾短其名自呼

炮炙論 雄曰蛤皮粗口大身小尾粗雌曰蚘皮細
口尖身大尾小

嶺表錄異 蛤蚘多巢榕木及城樓間雌雄相隨旦
暮則鳴或云鳴一聲是一年者彼人採以治肺疾。
旭按蛤蚘鳴聲無定或說大月三聲小月兩聲亦不
盡然

粵西偶記 蛤蚘人獲其雄懸壁間則其雌必來合
抱而死獲雌亦然

蜥蜴

正字通 蜥蜴一名蜥蜴

潛確類書

蜥蜴能食蝎故又名蝎虎

本草綱目

蜥蜴卽石龍子一名山龍子一名泉龍

一名石蜴一名豬婆蛇亦名守宮生山石間能吐雹可祈雨其狀似蛇四足頭扁尾長形細大者一二尺背有細鱗色金碧其五色全者爲雄入藥利水

雲蟲

觚賸 中州山嶺間有物如蜥蜴凡天將雨必緣石而上吐氣如珠青白不一久則大如瓊遂合併爲密雲山人名爲雲蟲

雖

說文 雖似蜥蜴而大

蜥

物類相感志 蜥狀類蜥蜴在水中能吞人吞人之
後必浮水上若昏醉然土人知其食人必醉伺以殺
之

諾龍

投荒雜錄 南海有水蟲名諾龍狀如蜥蜴俗說此
蟲欲食卽出水據石上凡水族過此無不跳躍自至
其前蟲因食之得者必雙其雌雄置竹筒中以節間
之少頃節自通故里人取爲婦人惑男子藥

蛇醫

本草綱目 蛇醫一名蛇師一名蛇舅一名水蜥蜴
一名蝶螈俗亦名豬婆蛇凡蛇有傷則銜草以敷之
又能入水與魚合故有諸名其狀似蜥蜴而頭大尾
短形粗青黃色亦有白斑者。旭按此物生草中吾
鄉呼鱗蜥疑鱗字乃蜥字之轉音也其肉可食或說
味極鮮美

雷公馬

嶺南雜記 瓊州有雷公馬狀如蜥蜴腹紫色背青
綠色頸上有鬣如馬生樹間螫人立死雷州海灘沙

上亦有之其形相似但無鬣彼人名沙鰩見人卽藏入沙中

蜈蚣

本草綱目 蜈蚣一名天龍節節有足雙鬚歧尾其性畏蠶繭及蜚蠊

抱朴子 蜈蚣能以氣禁蛇

五雜俎 蜈蚣長一尺以上者能飛龍畏之故常爲雷所擊或曰龍欲取其珠也

公餘雜誌 蜈蚣齧用手指甲磨水敷之其效如神他項毒物齧傷亦可治

聖濟總錄 嶺南多蛇瘴又名鎖喉瘴其症項大腫痛連喉用赤足蜈蚣一二節研細水下卽瘉

海蜈蚣

譯史紀餘 海蜈蚣長七八尺能以氣吸蛇相去四五步骨肉自消。旭按八紘譯史云安南有大蜈蚣盤樹上食人人結伴而行乃不敢近其皮可輓鼓肉白交人以爲佳品又談薈云唐天寶中廣州因海潮漂一蜈蚣至土人剖其一爪得肉一百二十斤

草鞋蟲

本草綱目 草鞋蟲似蜈蚣而小喜入人耳

馬蚊

正字通 馬蚊魯連名馬功莊子名商距爾雅名蜋
又名馬蟻其形如蚯蚓紫黑色足多寸斷之卽寸行
觸之卽側卧如環故又名刀環蟲又名馬陸又名馬
蠃又名馬蠲又名馬軸又名馬蠅又名馬蚰又名馬
蟻又名馬蛆又名截蛆又名蛆螺又名秦渠又名百
節又名百足又名千足又名𧈧。旭按此物多生濕
地其狀類蜈蚣長寸餘足尤多而長背皮極硬灰黑
色節節有紋如金線其行如飛螯人甚毒置地中雞
不敢食或又名緯骨蟲又名梳油蟲

飛虻

正字通 山中一種似馬虻而大烏斑色能登木羣吟者名飛虻。旭按此物尤毒本草謂之山蛰蟲取其一節燒灰服之令人惡聞酒氣

蝎

駢雅 杜伯蟬蟪蝎也。旭按杜伯或作杜白卽蠆也詩云卷髮如蠆

本草綱目 蝎一名蟬蟪一名蠆尾蟲狀似水黽八足尾長有節青黑色雄者螫人痛一處雌者痛牽諸處

酉陽雜俎 江南本無蝎有主簿以竹筒盛過江至
今往往有之故俗呼主簿蟲

養痾漫筆 耳暴聾者用全蝎去毒爲末酒調滴耳
中聞水聲卽瘳○旭按蝎毒在尾

急救方 蝎齧以蝸涎塗之或以木碗合之皆止痛
五雜組 蝎孕子在背長則破背出而母死

蚤

山堂肆考 蚤生於積灰雄小雌大俗名虻蚤或曰
布穀鳥所吐故三月最多○旭按或說螳化蚤

見聞錄 席下置芸香去蚤

蝨

潛確類書 蝨一名丹鴻

抱朴子 頭蝨黑着身變白身蝨白着頭變黑。旭
按蝨六足一種入足者多生下體其形較蝨畧扁又
巢氏病源載人腹中亦有蟲伏蝨長四寸羣蝨之主
也虵蟲長五六寸至一尺發則腹痛上下口吐清水
若貫心則死白蟲長一寸色白頭小生育轉多令人
虛弱至長一尺則殺人肉蟲狀如爛杏仁令人煩悶
肺蟲狀如蠶令人咳嗽成癆胃蟲狀如蝦蟇令人嘔
吐弱蟲卽膈蟲也狀如瓜瓣令人多唾赤蟲狀如生

肉動則腹鳴蟻蟲至微細居腸中令人生癰疽疥癬
等病惟臟腑氣實者則不能爲害焉又與人俱生者
爲尸蟲狀如馬尾長三寸依脾而居凡服補藥不先
去此必不得力又昔有人腹中生應聲蟲言語輒應
之一日讀本草至藍卽默然乃以藍汁飲之吐出肉
塊長二寸許人形皆具

席上腐談 蝨行向北

太平廣記 水銀去蝨

格致鏡原 吸北方之氣噴筆端書欽深淵默漆五
字置床帳間能除蝨

酉陽雜俎 取病者蝨於床前可卜病將瘥蝨向病者背則凶又山足濕處有草其葉如百合對葉獨莖莖微赤高一二尺名蝨建草能治蝨又有水竹葉如竹短小亦治蝨

雞肋編 取蝨放青葉草上經宿沾露則化小青蟲飛去

龍蝨

閩小記 漳州每歲八月十三至十五有龍蝨飛墮餘日則無人食之除面上一切斑點

五雜組 龍蝨與竈雞分毫無別

牛蝨

本草綱目 牛蝨卽牛蠅生牛身上狀如葦麻子有黑白兩種吃血滿腹常自墮地取白者焙研服之能解小兒痘疹毒。旭按牛蝨與牛蠅係兩物牛蝨似人蝨多生水牛背上牛蠅則大于牛蝨生牛腹下黃牛身上尤多恒自墮落

壁蝨

本草綱目 壁蝨臭蟲也狀如酸棗仁食人血惟薦下置麝香雄黃或菖蒲末或燒木瓜烟牛角烟螬壳烟可辟之。旭按卽扁蝨也或又名交蚤又名薦蠅

又錄異記載一種壁蝨生壁間暑月嚙人瘡雖痛每
年及期必發數年之後毒乃盡其狀與牛蝨無異北
都廐中馬因壁蝨致斃者甚眾疑此乃另是一種

沙蝨

駢雅 蝮蠃蓬活地脾沙蝨也

錄異記 潭袁處吉等州有沙蝨卽毒蛇鱗中蟲也
細不可見夏月蛇爲蝨所苦每入急水刷出或卧沙
中礮之人爲所齧狀如針孔四面有五色文得術士
禁之乃剗肉少許敷以生肌膏否則三日死

抱朴子 沙蝨水陸皆有之雨後人行沙中必着人

如毛髮入人皮裏宜以針挑取之不挑便入肉殺人
凡有此蟲處行還以火炙之則蟲隨火去

肘後方 沙蟲細不可見着人三日之後寒熱交作
嶺南人初有此便以茅葉或竹葉地刮去之仍塗以
苦苣汁

竹蝨

本草綱目 竹蝨一名竹佛子一名天厭子生諸竹
及草木上初如粉點久便能動百十成簇形如蝨而
色蒼灰

水蝨

蟬史 水蝨一名魚蝨生水中似人蝨而大長寸許
能化蜻蛉

蠟蟲

正字通 蠟樹有蠟蟲大如蟣蝨芒種後緣枝上食
汁吐涎黏嫩莖化爲白脂狀如凝霜處暑後剝取溶
化成蠟其蟲將遺卵必作房俗呼蠟種亦曰蠟子子
內皆白卵如細蟣一包數百次年立夏日取之用簪
葉包好分繫各樹芒種日蟲出復上樹作蠟。旭按
今五倍子亦蟲所造其蟲大如螳

蟬

正字通 蟬衣書中蟲形似魚尾歧身白有厚粉視之如銀一名白魚一名衣魚一名壁魚一名蛎魚俗名蠹魚

見聞錄 瓜子壳黏壁上久能化蠹魚

考槃餘事 芸香麝香樟腦辟蠹魚

原化記 建中時何諷得黃紙書內一髮長四寸如環無端絕之兩端滴水方士云蠹魚三食神仙字則化此名曰脉望夜持向天可墜星求丹

鞠通

說林 孫鳳有琴名吐綬有人唱曲則琴絃自相屬

和因改名曰自鳴琴琴背有孔如蛙一日有道士見
曰此中有蛙蟲因出黑藥少許置孔外俄有綠色蟲
走出道士取蟲去自後琴不能自鳴有博物者曰此
蟲名鞠通耳聾人置耳邊少時卽癒其蟲喜食古墨
孫始悟道士黑藥乃古墨屑也

竊蟲

續博物志 人家有小蟲至微而響甚尋之卒不可
見號竊蟲大如半胡麻形似鼠婦白色有兩角振其
頭則有聲。旭按此物多生人家屋柱及板壁中又
爾雅云國貉蟲蠶廣雅云土蠋蠶蟲說文云蠶知聲

蟲也玉篇云蠻禺蟲也疑皆指此物

嚮蟲

物類相感志 人行山取嚮蟲一枚握手中則不迷

樟蟲

正字通 樟蟲入醋死引其腹中筋長丈餘閩人用以緣蒲扇名曰蠶絲

蜡蟲

正字通 蜡蟲知雨至預藏草木下俗呼猥狗

結草蟲

採蘭雜志 結草蟲一名木蠹又名蓑衣丈人

古今注 結草蟲一名結葦好於草木上厠葉爲巢
鐵生蟲

儒門事親 鐵器久則生泡中有蟲如粟黑身黃首
紅嘴疾走名曰鐵生蟲

食膠蟲

酉陽雜俎 食膠蟲夏月食松膠前腳傳之後腳聶
之內之尻中

恙

天祿識餘 恙毒蟲也能傷人古人草居露宿故早
相見問勞必曰無恙

青牛

採蘭雜誌 青牛花葉上青蟲也有兩角似蝸牛

廣蟲

埤雅 廣蟲逢申日則過街又名過街蟲

本草綱目 廣蟲一名地鼈一名土鼈一名地蟬蟲
一名簸箕蟲一名蚵蚾蟲處處有之與燈蛾爲牝牡
○旭按此物多生濕地狀頗類鼈前狹而後濶背有
橫文蹙起頭小六足生腹下又名蚌虎以其氣能禁
蚌蠹也

黃蟲

名醫別錄 黃蟲生地上赤頭長足有角羣居

蟋蟀

古今注 蟋蟀一名吟蛩濟南人名嬾婦

方言 蜻蛉楚謂之蟋蟀或謂之蜚南楚謂之虻孫
爾雅正義 蟋蟀易識之物而禮記疏引蔡氏說以
爲斯蟲太平御覽引毛詩義問云蟋蟀食蠅而化成
高誘淮南子注以蟋蟀爲唧蛆皆不可從。旭按蟋
蟀卽趨織也一名促織又名投機處處有人畜之健
鬪獨尾者尤猛雄者頭小而身大有三尾不能鬪
促織志 促織生于草上者身軟生于磚石者體強

生于淺草瘠土磚石深坑向陽之地者性劣其色白
不如黑黑不如赤赤不如黃黃不如青其病有四一
仰頭二捲鬚三練牙四踢腿若犯其一皆不可用
金鐘兜

促織志 一種類促織而韻聲悠揚如金玉中出聽
之令人氣平者京師人謂之金鐘兜見暗則鳴遇明
則止○旭按卽油葫蘆也其狀似蟋蟀而絕大翼尤
長好夜鳴能飛不遠

竈馬

山堂肆考 竈馬一名竈雞其形類促織而身較長

鬚兩股褐色鳴聲纖纖然○旭按此物雄者亦三尾
藥思蠱

洗冤錄 粵西有藥思蠱狀類竈雞大如蠶豆能變
幻作小兒形遣嫁之法彷彿金蠶

山子

王漁洋精華錄 蜀地山中有蟲其聲如擊磬甚清
越彼人呼山子

鼠負

爾雅 蟠鼠負 註甕器底蟲

本草綱目 鼠負卽鼠婦也一名鼠姑一名鼠粘一

名濕生蟲一名地雞一名地蝨寇宗奭曰此蟲多足大者長三四分灰色背有橫文蹙起

丹戩

名醫別錄 丹戩生蜀郡狀如鼠負青股赤頭七月七日来之一名飛龍能治心腹積血

蚘威

爾雅 蚘威委黍 註舊說鼠負別名然所未詳○
旭按蚘威說者多言是鼠負竊以爲不然東山之詩云蚘威在室言周公居東時室無人居故生此物今鼠負所在有之或甕器底或磚縫中不必室中無人

而後生此物也一種似鼠負而絕大穹脊長鬚頭類
鼃雞四足兩股俗名佗負蟲者疑卽詩所謂𧈧威是
也專生空屋中若人所往來之處則罕見故郭氏此
註旣引舊說而又云所未詳蓋以𧈧威爲鼠負郭意
亦有不盡然者

砂按子

本草拾遺 砂按子生砂石中作旋孔其身如大豆
背有刺能倒行一名倒行狗子其性好睡又名睡蟲
生取之置枕中令夫婦相愛○旭按砂按子又名砂
俘人亦取爲媚藥

蟻

爾雅正義 大曰蚍蜉小曰蠆。○旭按蠆與蟻通卽馬蟻也其卵曰蚻大於蝨蟻而色白又一種尾後尖能螫人者俗名尖馬蟻多生樛間又有一種小於尖馬蟻而色正紅者春夏間糞土中最多或說是濕熱蒸化而成

詞林海錯 蟻一名蠶蟻一名石宮

方言 蟻齊魯曰蚍蠆梁益曰元蚍幽燕曰蟻蚍其場曰坻或曰埳

博物志 蟻能知雨

嶺表錄異 交廣溪洞中曾長多取蟻卵爲醬云味
如肉醬非尊貴不可得

打蟻

爾雅 蟻打蟻 疏蟻之大而赤色斑駁者名蟻一
名打蟻。旭按此卽山海經所謂朱蟻也老者有兩
翼能飛螫人今山野間有之冬則啣泥結窠於草上
大如碗

白蟻

本草綱目 白蟻名蟻一名飛蟻其性畏煇炭桐油
竹雞

天香樓偶得 白蟻似蟻而大色白腹肥有光老則生翼能飛。旭按此卽齊東野語所謂地虎也又名蚌蠹大爲人害嶺南雜記載有人藏銀於篋中亦爲所蝕云

赤蟻

赤雅 赤蟻大若象通身帶赤力負萬鈞能食虎豹蛇蟲其卵大如斗獠人取爲醬。旭按遺珠貫索載潮州之蟻有長尺許者然與此相較則又渺乎小矣

獨腳蟻

本草綱目 嶺南有獨腳蟻腳連樹根不能動

天鰕蟲

本草綱目

嶺南有天鰕蟲大如飛蟻秋社後入水

化鰕

蚰蜒

方言

蚰蜒自關而東曰蠚衡或曰入耳或曰蜚蠊

趙魏曰蚘蚘北燕曰蛆蛄。旭按蚰蜒卽蜒蚰也長寸餘無足背黃黑色腹色白其行有涎如銀能制蜈蚣相去寸許其肉自消今處處有之各不一曰涎牛日蚘窮日陵蠹日蝟蚘日鼻涕蟲日托胎蟲日蛞蝓陳藏器李時珍並以馬陸之小者爲蚰蜒另出蛞蝓

一條誤又或說蝸牛壳爲他蟲寄居或被雨水漂去則爲蚰蜒或說蚰蜒能入人耳皆屬附會不足信也
斜耕蟲

東軒主人述異記 康熙癸酉六月有沈姓掘泥得一物全似鰻身短而粗重十四兩烹啖甚肥父子四人同食之俱死有識者曰此名斜耕蟲能穿田使漏
蚯蚓

本草綱目 蚯蚓一名蠃螾一名胸肭一名堅蚕一名蜚蠊一名曲蟮一名土蟮一名土龍一名寒蟪一名寒蚓一名附蚓一名歌女一名地龍子處處有之

好夜鳴老則頸白。旭按堅蚕之蚕音膜或書作蠶
誤又續博物志載泥壁未乾揮涕其上陰雨時則化
蟲如蚯蚓又墨客揮犀載嶺南有異蟲如蚯蚓長尺
餘嘴利如錐多夜出半身着地半指空而行人誤觸
之直入人心腹中食人至死乃出土人目爲夜虎
正字通 蚯蚓一名鳴砌一名螳蟥一名捲端路上
踏死者名千人踏入藥良

續廣雅 土精地螾蚯蚓也

嶺南雜記 粵人名曲蟺曰土笋

稽神錄 雷震死取蚯蚓搗爛覆臍中可活

格致鏡原 五月五日午時於韭畦東首不語取蚯蚓乾之研末名六一泥有魚鯁者用少許擦咽喉外卽消

巨擘

餘冬序錄 孟子所謂巨擘者乃齊地有蟲類大蚯蚓人謂之巨擘善擘地以行故下文云蚓而後充其操朱註以爲大指非也。旭按巨擘或作巨白

雷蜺

酉陽雜俎 雷蜺大於蚓以物觸之則圓轉若鞠良久引首鞠形漸小後如蚓焉醫人甚毒

度古

酉陽雜俎 度古似書帶色類蚓長二尺餘首如鍬背上
有黑黃欄稍觸則斷嘗趁蚓蚓不復動乃上蚓掩之良久
蚓化惟腹泥如涎有毒雞吃則死俗呼土蠱

水蠱蟲

墨客揮犀 余一夕渴甚取水將飲聞水中有聲急呼
燭觀之得一蟲如蚯蚓細而長問左右曰水蠱蟲也入腹中
食人腸胃。旭按蠱類不一一種令人胃中生土一塊土內
生稻芒針刺心而死名稻田蠱見

五嶽游草又范石湖集載蠱毒在上則以升麻吐之
在下則以鬱金下之或二味同服不吐則下此方活
人甚眾

蜚蟊

淮南子註 鼓造蜚蟊也

本草拾遺 蜚蟊生池澤中背有黑點身小能跳接
百蟲解作唧唧聲其舉動極急○旭按此卽爾雅所
謂蜚蟊也其子名科斗又名活東又名活師又名元
魚又名懸針又名丁子又名水仙子又名蜚蟊臺今
春暮水邊有之多至一二百枚其狀似河豚黑色漸

則尾脫而足生或說月大先生前足月小先生後足
酉陽雜俎 蟹墓以聲抱

埤雅 蟹墓懷土雖取以置遠郊一夕復還其所

海蟹墓

坤輿外紀 海中有海蟹墓與石同色餓時卽入石
穴中於鼻內吐一紅線如小蚯蚓以餌小魚眾小魚
爭食之皆爲所吞

田父

正字通 田父卽文字集略之螭也大如履

洽聞記 蟹墓大者名田父好食蛇遇蛇則銜其尾

久之蛇尾後數寸皮雖不損而肉已盡。旭按此特似蜃墓耳並非大蜃墓也

謝豹

酉陽雜俎 號州有蟲名謝豹常在深土中小類蜃墓而圓如毬見人以前兩腳覆首如羞狀能穴地如鼯鼠頃刻深數尺若出地聽謝豹鳥聲則腦裂而死

山蛤

蟬史 山蛤一名南風蛤又名石蜃生山谷中遇南風則出背黑色多痂磊兩股甚長孝豐人連皮蒸食格致鏡原 山蛤似蜃墓黃色生山石中能吞氣飲

風露不食雜物。旭按此疑卽格物總論所謂黃蛄也。

溪狗

正字通 溪狗生南方溪澗中狀類蟹蟄尾長三四寸燒灰水服治溪毒及遊蠱。旭按此疑卽格物總論所謂蚰黃也。

蟾諸

爾雅 鼃鼃蟾諸 註似蟹蟄居陸地淮南謂之去蚊。旭按蟾諸卽蟾蜍也又名去蚊又名鼃鼃又名鼃鼃毛詩作戚施多生人家濕處其狀類蟹蟄而大。

黃黑色其背如癩故俗呼癩蟹墓或以爲卽蟹墓誤
正字通 蜘蛛蟾諸也又名苦蟹又名蛤蚧

抱朴子 蟾諸壽三千歲者頭上有角頷下有丹書
八字名曰肉芝食之可仙

談薈 蟾諸肪塗玉刻之如臘

海蟾

譯史紀餘 海蟾三足口能吐霧。旭按此疑卽俗
所謂三足蟾也又雲仙雜記云孫願得三足蟹墓數
十或亦此物

蛙

本草綱目 蛙一名長股一名田雞一名青雞一名
坐魚一名蛤魚蘇頌曰處處有之狀類蟹螯尖嘴細
腹背青綠色俗名青蛙其背作黃路者又名金線蛙
○旭按此卽月令所謂蠃也能食蝗又名護穀蟲一
種正月卽出者名黃蛤

延壽書 妊婦食蛙令子少壽

蛤蛙

投荒雜錄 南方水中有一種似蛙而形尤惡者名
蛤蛙味極美能治男子虛癆

鼃

爾雅 在水者鼃 註耿鼃也似青蛙大腹一名土鴨

本草綱目 陶宏景曰土鴨似蛙而大青春鳴聲甚壯蘇頌曰卽石鴨也

水雞

本草綱目 陶宏景曰一種似蛙而色黑者名蛤子味至美蘇頌曰卽水雞也閩蜀浙東人以爲佳饌。旭按此疑卽格物總論所謂黑虎也

石雞

日用本草 石雞卽長股也一名錦襖子六七月生

山谷間性味同水雞。旭按泉南雜誌云石鱗魚紫斑如纈錦生溪間高處大如雞甚難得彼人帶皮食之卽此物

水虎

襄沔記 中廬縣有涑水注沔中有物如三四歲小兒甲如鯪鯉射不能入秋曝沙上膝頭似虎掌爪常沒水出膝示人小兒弄之便咬人人生得者摘其鼻可小小使之名曰水虎。旭按水虎一作水君或作水唐

壓油

綱鑑通俗 蓋州有蟲名壓油似水鳧每春暮油滿
從水中出自呼其名入取以重物壓之油出祇存皮
投水中復活

蜮

山堂肆考 蜮一名水鏡

正字通 蜮一名射工一名射影一名水弩一名抱
槍一名含沙一名短狐一名水狐一名溪鬼蟲。旭
按水弩短狐說者多以爲一物惟赤雅言水弩與短
狐不同今考錄異記所說水弩形狀與驗方新編所
說射工形狀亦各有不相似處或是兩物未可知也

又南中志載永昌郡有禁水惟十一二月可渡餘月則殺人其中有惡物不可見中人則週身青爛名曰鬼彈亦此類

錄異記 水弩似蝘蝓黑色八足有鉗尾長三四寸卽弩也每歲四月一日上弩八月一日卸弩時彎其尾自背而上於頭以鉗執之見人影卽射中者毒與沙蟲同治法亦相似

公餘雜志 射工出南方有溪毒處長二三寸濶寸許形扁前寬後窄腹軟背硬如蟬又如鼈六七月甲下有翅能飛作鈹鈹聲大頭尖嘴嘴上有角如爪長

一寸六足如蟹蟹兩足在嘴下大前一爪四足在腹
下小而雙爪口有弩形以氣射人影去人三四步卽
中令人發瘡不治必死其病有四種初得皆如傷寒
或似中惡一種遍身有黑鱗子四邊微紅犯之如刺
一種作瘡久則穿陷一種突起如石一種身如火燒
患者急飲豬血可解或取豉母蟲一枚含口中尤妙
本草綱目 射工蟄處雖雪不積掘下尺餘取出陰
乾以其角爲末佩之仍辟射工毒

蚺青

綱鑑通俗

蚺青產海中狀類人首眉目宛然

土肉

正字通 土肉生海中色黑長五寸大如小兒臂有腹無口耳多足可炙食。旭按或說此物食紅則色紅食綠則色綠不必皆色黑也又本草載昔有人於河次得小兒手無指無血懼而埋之李時珍云此卽白澤圖所謂封也食之多力

元羅

綱鑑通俗 元羅產海中狀類人足

咸車

綱鑑通俗 咸車產海中狀類男陰

海參

閩小記 海參以遼東產者爲上產閩中者色白而劣。旭按一種有刺者爲刺參

海燕

本草綱目 海燕出東海大一寸狀扁面圓背上青黑腹下白脆似海螵蛸有紋如菌口在腹下食細沙口旁有五路正勾卽其足也臨海水土記名陽遂。旭按綱鑑通俗載通遠軍渾水中又有一種小蟲類魚長尺許鳴作覓覓之聲見者以挺刃擊之卽化爲石可礪刃快而且久名曰覓石价值一二千緡

水蠶

本草綱目 水蠶身長如蝸能變蜻蜓。旭按此物身扁而黑

水龜

本草綱目 水龜一名水馬卽今之水爬蟲也扁身大腹而背硬陳藏器曰此物好遊水上水涸卽飛其身長寸許四腳

五雜組 水馬嗜蠅以髮繫蠅餌之則擒抱不脫釣至几案亦不知

負子

酉陽雜俎

負子水蟲也有子多負之

石尤

楊慎外集

石尤江中水蟲也出則有惡風

鼓蟲

本草綱目

鼓蟲一名鼓母蟲大如豆而光黑用白

梅裏含一枚能除射工毒

寫字蟲

事物紺珠

寫字蟲如大黑豆施行水面

九香蟲

本草綱目

九香蟲一名黑兜蟲產貴州永甯衛赤

水河大如小指頭狀似水黽身青黑色冬則伏於石
下土人取之以充人事驚蟄後卽飛出不堪用

泥

蟬史 泥一名沙噀

天祿識餘 南海有蟲無骨名曰泥得水則紅活失
水則如泥

蛭

爾雅 蛭蟻。旭按蛭一名蟻或作蚊卽至掌也俗
名馬蟻又名馬蜚又名馬鼈生水田中又名水蛭又
名水痴其身狹而長黃色能入人脛股其性難死雖

搗爛如泥得水仍活人誤吞之漸致黃瘦治法用黃泥搗碎和水飲之卽下或雄黃亦可一種生石上及草中者頭尖腰粗色赤或說誤吞之令人眼中生烟漸漸枯損

物理小識 馬蟥燒成灰以碗覆於地隔一夜復生
飛馬蟥

事物紺珠 飛馬蟥生蜀地深山中長四五寸飛着人卽穿衣絮入皮中啞血人不知痛及知已大如筋甚爲害惟觸青衣則落地。旭按此卽事物原始之蜚蛭也有四翼

禾蟲

嶺南雜記 禾蟲似馬蟻身軟如蠶細如箸長二寸餘青黃色廣人喜食之

蛭

爾雅 蛭 蛭 疏井中小赤蟲也名蛭一名蟬一名蛭又名了了。旭按此卽莊子所謂軒蟹列子所謂厥昭也其身細如縷長二三分灰黑色亦有紅色者生汙水中其性喜浮水見人則沉入水底其行一曲一直以腰爲力若人無臂狀水缸內亦有之又名水蛆老則化豹腳蚊一種相似而頭大尾尖者名鉅

虎

蛆

正字通 蛆蠅子也生敗臭物中。旭按物腐則蟲生不必盡是蠅子且其類亦不一有身長而細者有身短而粗者有兩頭黑者有尾長寸許者皆各隨所在而異者也其用亦不一凡生廁中者名五穀蟲能治小兒疳積生馬肉中者能治針箭入肉及蟲牙痛生泥中者能治目赤修治之法並詳本草又或說蛆老則入墻縫中脫壳爲蠅

致富全書 草烏切片投醬中不生蛆

水蛆

酉陽雜俎 水蛆南方溪澗中蟲長寸餘色黑夏變
蚊螫人甚毒